

## Aston

Atressi co·l signes fai  
quant vol morir, chan,  
quar sai que genseis morrai  
et ab mens d'afan.  
Ben m'a amors tengut el latz  
e mainz trebaills n'ai sofertatz,  
mas pel dan c'aora m'en ve  
conosc qu'ancmais non amei be.

E doncs qual conseill penrai  
s'aissi muer aman?  
Qu'ieu joi non aten de lai  
on miei sospir van;  
pero non part ma voluntatz,  
si tot n'estauc desesperatz.  
Pensiu e consiros mi te  
cella de cui plus mi sove.

El mon tal domna non sai.  
Dieus, per que l'am tan?  
Que ja non li ausarai  
dire mon talan.  
Gen m'acuoill e·m fai bel solatz,  
mais del plus son desconseillatz,  
car, s'ieu li clamava merce,  
tem que puois se guardes de me.

Preiars, lai on non s'eschai,  
torn' en enuey gran.  
Ses parlar la preiarai.  
E com? Ab semblan,  
et ill conosca o si·l platz.  
Car aissi dobla·l jois e·l gratz  
quant us cors ab autre s'ave,  
e quant hom ses querre fai be.

Franquez' ab fin cor verai  
trai amor enan;  
autz paratges la deschai,  
que·ll ric son truan,  
que tan n'i a de rics malvatz  
per que·l segles n'es sordeiatz.

E domna, que bon pretz mante,  
non am per ricor, s'als no i ve.

Chansoneta, vai t'en lai,  
non ges q'ieu re·il man,  
mas ben li potz mon esmai  
dire ses mon dan.  
Digatz li c'a leis es donatz  
mos coratges et autreiatz;  
sieurs son e sieurs serai jase;  
morir puosc per ma bona fe.

Bona domna, on que siatz,  
jois si' ab vos e joi aiatz,  
qu'eu non vos aus clamar merce  
mas sivals pensar o puosc be.

- letto 606 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911  
CF 80209930587 PI 02133771002

---

**Source URL:** <https://letteraturaeuropea.let.uniroma1.it/?q=laboratorio/aston-0>